



Nos morts

Mariuschla Loretz-Hendry, Surrein

naschida: 11 da mars 1919

morta: 23 da december 1998

Nunspitgadamein, veramein nuspitgadamein ha il zenn grond da Sedrun cun siu tun lamentont clamaus ils 23 da december che la mort hagi fatg sia raccolta. La Mariuschla Loretz da Surrein seigi morta. La Mariuschla ? ein biars sedumandai e stai stui e perplex.

Gie, ei ha plaschiu al Segner da clamar tier el sia survienta. Ins astga veramein dir cheu sia survienta, pertgei la Mariuschla ei vegnida educada e carschida si suenter il dir da nos vegls: Ura e lavura e Dieus gida lura.

Naschida a Surrein ils 11 da mars 1919 sco emprema d'ina famiglia da 10 affons, sco feglia da Leci Antoni Hendry e dalla mumma Mariuschla naschida Monn. Naschida en ina famiglia cun crusta tujetschina e purila che ha pretendiu baul da luvrar e segidar. Suenter giu visitau las scolas della val ha ei giu num segidar, segidar culs geniturs, segidar cun la mumma suenter la mort dil bab, e

segidar culs fargliuns. Mo per ella ei quei mai stau in stuer. Ella ha gidaud per quei ch'ella ha viu che quei ei siu pensum ed ella ha fatg bugen ed ha fatg bien. Ella ei stada ina femna da cor, ruasseivla e buna.

1956 marida ella il Giachen Loretz da Selva. Forsa ein biars stai surstai da quella caussa. Mo las vias dil Segner ein beinenqualgadas buca capeivlas a nus temporans. Omisdus conjugals vegnevan dad uclauns ed aschia eis ei forsa stau dau caparra che la pasch e la ventira han regiu en lur casa. Lur fegl ei staus ad els lur sulegl e lur sustegn. La mort ha contonschiu il Giachen igl onn 1986. Il segidar cun ils frars Leci, Baseli ed il Tin ha mantenui ella vinavon e schau emblidar empau la sperdita da siu um. Suenter la mort dil frar Baseli serendan il Tin ded il Leci igl onn 1995 a Sedrun en casa s. Vigeli. Aschia ha la Mariuschla buca giu pli tonta truscha e saviu prender pli bien.

Tec a tec ha la sanadad entschiet a mudergiar la Mariuschla, aschia ch'ella sto serender igl onn 1997, l'entschatta december el spital a Glion. Suenter 3 jamnas retuorna ella e suonda ses frars en casa s. Vigeli a Sedrun. Il schar encrescher per fegl, vitg e casa carmelava bein empau. Tier la missiun ha ella fatg sia davosa viseta a Surrein ed haveva gia fatg plans da festivar uonn Nadal tier la famiglia da siu fegl. Denton eis ella vegnida clamada dil Segner nunspitgadamein in di avon Nadal ed ella ha fatg il viadi grond nua che nus sperein sin in seveser.